

INUIT ATAQATIGIIT

INATSISARTUNI



Nuuk, 16.05. 2013

Inatsisartut Suleriaasianni § 37 naapertorlugu Naalakkersuisunut imaattunik apeqquteqar-punga.
(Inatsisartuni ilaasortaq Juliane Henningsen, Inuit Ataqatigiit)

Apeqqutit:

1. Naalakkersuisooqatigiit isumaqatigiissutaanni atuarneqarsinnaavoq: "Avataaneersu-nik sulisunik killilersimaarinninnermi nakkutilliineq sakkortusineqassaaq." Oqaase-qatigiit innersuullugit paaserusuppara avataaniit suliartortut killilersimaarniarne-qarneranni nakkutilliineq qanoq sutigullu Naalakkersuisunit sakkortusineqassamaar-nersoq?
2. Inuiaqatigiit peqqissut suliffissaqartinneqartullu Naalakkersuisunit pilersinniarne-qarput. Tamannamita qanoq sutigullu qulakkeerniarneqarpa?
3. Inuit suliffissaaleqigallarnermik eqqugaasartut pilertortumik aammalu siunnerfeqar-tumik iliuuseqarnikkut sulilerseqqinneqassasut Naalakkersuisunit nalunaarutigineqa-reerpoq. Neriorsuut tamanna eqqortissinnaajumallugu Naalakkersuisut iliuutsit tigusaasut nutaat suut aallartilersaarpat?
4. Suliffissaaleqinerup akiorniarneqarnissaa immikkut ittumik iliuuseqarfiginiarlugu Naa-lakkersuisuusimasut suliniutigisaat aallartissimasaallu Naalakkersuisut ingerlateq-qissamaarpat?
5. Suliffissaaleqinerup akiorniarneqarnissaanut atatillugu aningaasaliissutit Naalakker-suisut naliliinerat tunngavigalugu naammassorineqarpat?
6. Aningaasaqarnermut Naalakkersuisup isumasioqatigineqarnerani Naalakkersuisoq oqaaseqarpoq qinigaaffimmi matumani Naalakkersuisooqatigiit suliffissaaleqinerup affaannangortinnissaa siunnerfigisimagaat. Tamannamita qanoq piviusunngortin-niarneqarpa?
7. Kommunenit suliffissaaleqisut amerlassusaat qanorlu agguataarneqarnerat pillugu qanoq Naalakkersuisut nassuiaateqarsinnaappat aammalu inatsit malillugu taak-kunangga qassimita inuttut iliuusissanik pilersaaruserfigineqarsimappat?

Tunngavilersuut:

Qineqqusaarnerup ingerlanerani inuiaqatigiinni suliffissaaleqisoqarnera annertuumik sam-mineqartoq oqaatigisariaqarpoq. Suliffissaaleqineq akiorniarlugu tigussaasunik sunik Naa-lakkersuisut iliuuseqalersaarnersut taamaammat tusarfigissallugu soqutiginassaaq.

Suliffissaaleqisoqaraluartorli illoqarfinni annerni takulertorlartoq tassaavoq sulisussanik ava-taaneersunik tikisitsuarneq – pingaartumik sanaartornerup, eqqiaasitsisarnerup, aku-nittarfeqarnerup neriniartarfeqarnerullu iluani, uffa atorfiit tamakku nunaqavissunik kivin-neqarsinnaassasut takorloornaraluartoq Nunatsinni suliffissaarusimasut aamma amerliartor-nerat eqqarsaatigissagaanni. Pissutsit taamaalersimanagerat Inatsisartut ataatsimiittarnerini tikkuartareerparput, matumuunalu taamaalioqqippugut.

Inuit Ataqatigiinni tunngaviusumik isumaqarpugut atorfiit inuttaqanngitsut sapinngisamik nunaqavissunik inuttalerneqartassasut, taamaaliornikkut akileraarutitigut isertitassat aam-malu ilisimasat Nunatsinniiginnarsinnaaniassammata. Inuit Ataqatigiit aammattaaq angu-niagaraarput innuttaasut tamakkiisumik ilaannakortumilluunniit imminnut pilersorsinnaa-lerlutillu inuiaqatigiit aningaasarsiornikkut ineriartornerannut ikorfartueqataalersinneqassa-sut inuttut namminneq aamma ineriartuutigisaminnik.

Avataaniit suliaartortut pillugit inatsit nutarteriffigissallugu taamaammat piffissanngorsori-
narpoq pisariaqarlunilu. Nakkutilliineq qanoq sutigullu sakkortusineqassanersoq paasi-
saqarfigissallugu taamaammat kissaatigaara.